



本著作以創用CC「姓名標示-非商業性-禁止改作」4.0國際授權條款釋出。  
詳細授權條款，請至 <http://creativecommons.org/licenses/by-nc-nd/4.0/>。  
資料來源：教育部電子報「閱讀趣聞客語」專欄 <http://epaper.edu.tw>。

閩／懷想／☆☆☆★

## 偷食

以早逐家生活較艱苦，三頓食會飽就真好矣，無彼號冗剩錢通買糖仔餅，囡仔人當然嘛無所費通領。一直到讀國中的時嘛無家己的四秀仔錢。毋但我無，阮彼箍圍仔的囡仔伴逐家嘛攏橐袋仔袋磅子。

囡仔人上大的享受就是食四秀仔，閒閒罔啖糝佬好你敢知？無錢通買就想空想縫。厝裡煮食的烏糖、糖霜、配飯的菜脯、阿媽豉的梅仔，逐項攏通提來窰喙空。大人毋准囡仔食，囡仔只好偷食。有一日麗玲揣著寶：「阮阿母舊年豉一甕梅仔，藏仔眠床跤。昨昏我爬入去揣珠仔，去予我看著。今仔日我請恁來去食。」

聽著是梅仔，喙裡親像水泉溢瀉瀉，枵鬼瀾涌涌滴，一秒鐘都袂等得。三步走、兩步跳，去到麗玲個兜。甕仔蓋拄拍開，逐家就相爭欲伸手入去擷。麗玲捧一塊碗公、一枝湯匙仔趕緊擋咧講：「袂使用手啦！規甕生菇我就害！垃圾手攏共我閃開！用湯匙刮啦！」

「足芳的呢！加刮寡啦！」

「刮五下有夠矣！小等阮阿母若知，袂予我遐好食睏！」

「遮大甕，看袂出來啦！」

「謬！恁咧偷食梅仔乎？我欲共阿母講！」

啥人知去予麗玲個小弟阿源佱阮小弟阿坤掠包！驚個做報馬仔，我趕緊共安搭：「逐家攏有通食，莫烏白講啦！小等咧阮欲去土地公廟遐放風吹，恁欲去無？」

「好！好！好！阿姊你愛做一隻風吹予我喔！」這兩個抓耙仔，愛哭閣愛綴路，今仔日算個好運。去到土地公廟的榕仔樹跤，逐家那食梅仔那做風吹。「喔！麗玲恁阿母豉的梅仔加真好食呢！無像阮阿母豉的遐鹹！」逐家一粒閣一粒，愈食愈繼喙。喙無閒，手嘛無停咧削竹片、絞紙、縛索仔。

阿坤講：「阿姐！我的風吹愛有長長長的尾溜喔！」

阿源雄雄大聲喝：「恁攏食遐濟！遮的梅仔湯愛予阮兩個食。」阿源佱阿坤碗公捧咧就走入去土地公廟內底。等風吹拄做好，我聽著麗玲大聲咧喝：「這兩個吵班的哪會睏去啦！閣規面紅絳絳呢！」原來彼甕是梅仔酒，個兩個嚇甲酒醉去矣！免講，阮遮做人兄姊的，轉去就有一頓粗飽矣。

作者：林桂鄉

### ☆詞彙學習☆

【所費】sóo-huì：費用、花費。

【橐袋仔袋磅子】lak-tê-á tê pōng-tsí：口袋裡裝的是砵碼，看來很重，其實不是錢。形容人窮。

【啖糝】tām-sám：解饞、淺嚐，為消遣用。

【想空想縫】siūnn-khang-siūnn-phāng：計畫性地想盡各種辦法去做壞事。

【糖霜】thê-sng：冰糖。

【豉】sinn：把生鮮的食物如蔬果、肉類、海鮮等，醃漬成醃漬品。

【擷】jîm/lîm：掏。

【好食睏】hó-tsiáh-khùn：吃得下睡得香，過好日子。常引申指稱心如意。

【掠包】liáh-pau：揭發、揭穿。抓到把柄、小辮子。

【安搭】an-tah：安撫。